

*Pagtulon-an 18 — Tan-awa Ang
Inyong Hari Magaabut Na
(Mateo, Marcos, Lucas, Juan)*

KATUYOAN: Pagtudlo sa pagpaila ni Cristo ngadto sa Iyang mga katawohan.

Upat ka gatus ka tuig sa pagpakahilom! Gikalimtan na ba lamang sa Dios ang Iyang mga saad. Moabut pa ba kaha ang gisaad nga Hari? Sa kalit may tingog nga mibuak sa kahilom! Ang Dios nagpakigsulti pag-usab sa Iyang mga katawohan. Mao kadto ang tingog ni manalagna Juan Bautista. Patalinghugi ang Iyang gisang-yaw; "Paghinulsol kamo, kay ang gingharian sa langit haduol na," Mateo 3:2,3. "Andama ninyo ang dalan alang sa Ginoo, tul-ira ninyo ang Iyang mga agianan." DALAN SA GINGHARIAN kina-hanglan pagaayohon ug pagatul-iron kay moabut na ang Hari.

Katloan ka tuig (30) sa wala pa si Juan magsugod pagmantala, may usa ka bata natawo sa Betlehem. Ang Iyang ngalan mao si Jesus, kay siya magaluwas sa Iyang mga katawohan gikan sa ilang mga sala, Mateo 1:21-23. Ug sulod niining katloan ka tuig diyutay lamang kaayo ang nasulat mahitungod sa Iyang kinabuhi.

Jayon miabut niadtong adlawa si Juan Bautista nagamantala, "Paghinulsol kamo!"

1. "Ug nangadto kaniya ang katawohan gikan sa Jerusalem ug sa tibuok nga Judea ug sa tanang kayutaan nga kasikbit sa Jordan, ug didto sa suba sa Jordan iyang gibautismohan sila, sa pagsugid nila sa ilang mga sala," Mateo 3:4-6. Mao kini ang paagi aron matul-id ang DALAN SA GINGHARIAN ug maandam inig-abut sa Hari.

2. Ug miabut si Jesus ug miduol kang Juan; ania ang pag-pamatuod ni Juan, "Tan-awa, mao kana ang Cordero sa Dios, nga magakuha sa sala sa kalibutan," Juan 1:29. Apan si Juan midumili sa pagbautismo kang Jesus. Basaha ang gipamulong ni Juan sa Mateo. 3:14-17.

3. Unya si Jesus gihatud sa Espiritu ngadto sa mga awaaw nga dapit aron tintalon sa yawa. Ug sa matag pagsulay ang tubag ni Jesus gikan lamang sa Pulong sa Dios. Pinaagi niini si Satanas napildi.

4. Sukad niadtong higayona si Jesus misugod sa pagwali sa pagingon, "Paghinulsol kamo, kay ang gingharian sa langit haduol na," Mateo 4:17.

5. Mipaila Siya nga mao ang Anak sa Dios ang gipaabut nga Hari. Sa pagkatinuod Siya mao ang gipanagna sa mga profetas, Naghimo Siya ug kahibulongan nga mga milagro; nangayo sa mga masakiton, mga sanlahon; nangayo sa mga buta; gipasugot ang mga balud ug nagbanhaw sa mga patay.

6. Nagpili Siya ug 12 ka apostoles ug naghatag kanila sa gahum, Mateo 10:1-10. Iyang gipadala sila nga adunay mga sumbanan nga ilang pagasundon nga daku kaayo ug kalainan sa autoridad ug mga sumbanan sa mga magwawali karon.

a. "Pangadto kamo dili sa agianan sa mga Gentil . . . kondili pangadto hinoon kamo sa mga nangawalang karnero sa banay sa Israel. Ug pagwali kamo nga magaingon, 'Ang gingharian sa langit haduol na.'"

b. "Ayoha ninyo ang mga masakiton, banhawon ninyo ang mga patay, hinloi ninyo ang mga sanlahon, pagulaa ninyo ang mga yawa . . . ayaw kamo pagbalon ug bulawan o salapi, o duha ka kamisola o duha ka sapin." Mateo 10:8,9.

Usa ka adlaw dihay katingalahan nga nanghitabo. Ughni sa atong dibuho kita nagapanaw sa DALAN SA GINGHARIAN ug ang Dios walay pagdumala sa mga Gentil diha sa KADALANAN SA MGA GENTIL. Ang Israel mao ang gipili sa Dios nga maoy iyang himoon nga galamiton alang sa kalibutan kay ang mga Gentil dugay na nga gisalikway sa Dios didto pa sa tore sa Babel. Si Jesus didto sa kayutaan sa Tiro ug Sidon ug may miabut nga babaye gikan sa Canaan. Basaha ang maong sugilanon sa Mateo 15: 21-28. Kining maon nga babaye, usa ka Gentil, ug tungod kay nakabati siya sa gahum sa Ginoong Jesu-Cristo, miadto kang Jesus gikan sa KADALANAN SA MGA GENTIL aron siya mapanalanginan, ug tungod sa iyang pagtoo gihatagan siya ug pagtagad sa Ginoong bisan ug dili pa panahon nga ang panalangin sa gingharian ihatag ngadto sa mga Gentil.

“Tan-awa, ang imong hari nagaanhi kanimo, maaghop ug naga-kabayo sa asno . . .” Mateo 21:5. Karon ang mga Israelinhon nagatawag kang Jesus nga ilang Hari. Apan ang mga pangulo nga sacerdote ug escribas wala mahimuot, Mateo 21:15. Ang nasud sa Israel wala na magpadayon sa pag-abi-abi kang Jesus ingon nga ilang Hari.

Atong balikon ang panahon sa pagbautismo kang Jesus. Ngano nga Siya nagpabautismo? Ang katuyoan mao ang “Pagtuman sa tibook nga pagkamatarung.” Ang bautismo alang sa nasud Israel naghulagway sa paghugas sa ilang mga sala. Mga Buhat 22:16. Si Jesus wala makaila ug sala, apan dinhi niiniing nga higayona iya na nga gisugdan ang pag-angkon, ang lugar o dapit sa mga makasasala, aron sa tanang kahimtang mahisama sa iyang mga igsoon, Hebroehanon 2:17, sa paghimog halad—pasig-uli alang sa mga sala sa katawohan, aron pinaagi Kaniya mahatagan sa hingpit Niya nga pagkamatarung.

Sa atong sunod nga pagtulon-an atong susihon sa unsang hinungdan si Cristo masinugtanon nga mihalad sa Iyang lawas sa kalbaryo, nga sa hingpit giangkon Niya ang atong sala. Karon, ang mao nga buhat Niya hingpit na ug ikaw makabaton sa kaluwasan kon motoo ikaw nga Siya namatay puli kanimo tungod sa imong mga kasal-anan. Dili ikaw makaluwas sa imong kaugalingon; ang paagi lamang mao nga motoo ug modawat Kaniya nga imong bugtong nga manluluwas.

SAG-ULOHON: “Tungod kanato Siya nga wala makasinati ug sala gihimo Niya nga sala, aron diha Kaniya kita mahimong pagkamatarung nga anaa sa Dios,” 2 Corinto 5:21.

Pagtulon-an 18 — Pagatubagon

Isulat diha sa blanko ang grupo sa mga pulong:

1. Human sa 400 ka gatus ka tuig nga pagpakahilom sa Dios, ang nasud Israel nakadungog sa tingog ni
nga nagaingon “”

Mateo 3:1-3.

2. Ang uban nga mga katawohan sa Israel nanag-andam sa ilang kaugalingon sa pag-abut sa ilang Hari pinaagi sa

. Mateo 3:1-3.

3. Si Juan nag-ingon nga siya nagbautismo sa tubig apan siya nga nagapaulahi kanako magabautismo kaninyo Mateo 3:11.

4. Si Jesus nag-ingon nga siya nagpabautismo aron sa pagtuman Mateo 3:15.

5. Gihatagan ni Jesus ang Iyang mga apostoles ug gahum sa paghimo niining mosunod nga mga milagro aron sa pagpamatuod nga ang Hari ania na ug ang gingharian sa langit nga tukoron dinhi sa Jerusalem haduol na. Mateo 10:8.

- a.
- b.
- c.
- d.

Pangitaa diha sa mga bersikulo kining mosunod nga mga pangutana.

6. Ngano nga gitugon ni Jesus ang Iyang mga apostoles sa dili pag-adto sa kadalanan sa mga Gentil? Marcos 7:27.

7. Nganong gihatagan ug pagtagad ni Jesus ang hangyo sa usa ka Gentil nga babaye? Mateo 15:28.

8. Ngano nga kining usa ka bahin sa MATAAS NGA DALAN SA KINABUHI gitawag nga DALAN SA GINGHARIAN? Mateo 21:5.

9. Ngano nga dili na kinahanglan sa mga tawo nga nagkinabuhi ilalum sa PANAHOON SA GRASYA bautismohan pa sa tubig aron makabaton sa pagkamatarung? 2 Corinto 5:21

10. Isulat nga SINAG-ULO ang 2 Corinto 5:21.

.
.